

GERTAKARIA. Ertzaintzak izandako jarrera kritikatu du zaurituaren familiak, eta epaitegian salaketa ipiniko du



DAVID AGUILAR / EFE

Imaz Jaurilaritzako bozeramaileak —eskuinean— babestu egin zuen atzo Balza sailburuaren —ezkerrean— ardurapeko Ertzaintzaren lana.

Barakaldoko gazte bat koman dago, ertzain batek borraz buruan jo ostean

Zaurituaren lagunek eta Ertzaintzak gertatutakoaren bertsio kontrajarriak eman dituzte

Erredakzioa | BILBO

Barakaldoko J.A.V.A. 23 urteko gaztea koma egoeran dago Gurutzetako ospitalean, joan den igande goizaldetik. Ertzain batek borrarekin eman zion buruan, eta hasieran zauri bat baino ez zirudiena, buruko edema bihurtu zen. Gurutzeta ospitaleko sendagileek bost ordu iraun zuen ebakuntza egin behar izan zioten, odolbatua kentzeko. Orain, koma egoeran dago, eta arnasa hartzeko, makinen laguntza behar du. Zaurituaren lagunek eta familiakoek ertzainen kontrako salaketa ipiniko dute. Herrizaingo Sailak, bere aldetik, zer gertatu zen zehatz-mehatz jakiteko barne ikerketa zabaldu duela jakinarazi zuen atzo, eta Justiziari laguntzeko prest dagoela agertu zuen.

Hala ere, zaurituaren lagunek eta familiakoek gertatutakoaren inguruan atzoko Gara egunkarian azaldu zuten bertsioa eta Ertzaintzak emandakoa ez datoz bat. J.A.V.A. barakaldarrak borra kolpea hartu zuen momentuan berarekin zeuden lagunek azaldu zuten, ertzainek «arrazoirik gabe» ekin zioten beraien kontra. Igande goizaldeko 04:30 inguruan gertatu zen. Itxura batean edanda zegoen gizonezko bat Ferrerías kale-

ko garage baten ateari ostikadak eta ukabilkadak ematen ari zen. Barakaldoko udaltzaingoko patruila bat gizonezkoa atxilotzen ahalegindu zen, baina arazoak izan zituztenez, laguntza eskatu zioten Ertzaintzan. Inguruan zeuden J.A.V.A. eta lagunak. «Pitbull zakurrak bezala jaitzi ziren autoetatik. Gehiegikeria izan zen. Hiru-lau auto izango ziren. Berehala geldiarazi zuten, belauniko ipini zuten, eta ostikadak eta borrakadak eman zizkieten», agertu zion zaurituaren lagun batek Gara-ri.

Ertzainen jarrera ikusitakoan, lagun taldea ingurura hurbildu zen, eta «nahikoa» zela adierazi zieten ertzainei. «Horrela jarraituz gero, gizon hura hil egin behar zutela esan genien, eta orduan, gugana etorri ziren, eta handik alde egiteko esateaz gainera, ostikadak eta borrakadak eman zizkiguten», jarraitu zuten lagunek. J.A.V.A. lurrean jarrita zegoen, eta zutitu zenean eman zioten buruan borrarekin. Burutik odoletan zegoelako, San Eloy ospitalera eraman zuten lehenengo, baina han egoera

gaiztotu egin zen, eta Gurutzetako ospitalera eraman behar izan zuten, bertan ebakuntza egin ziezaioten.

Lagun taldea Gurutzetako ospitalean zela, atxilotutako gizonezkoa ikusi zuten sartzen larrialdietako atetik, «gorputzean eta aurpegian kolpeak zituela».

Ertzaintzak dio gazte taldeak atxiloketa saihestu gura zuela

Herrizaingo Sailak atzo eman zuen gertatutakoaren bertsioa. Esan zuenez, ez ziren hiru-lau auto izan, Ferrerías kalearen inguruan zeuden ertzain bi joan ziren udaltzainei atxiloketa bat egiten laguntzera. Orduan, «edanda zeuden hamar pertsona inguru» atxiloketa egiten ari ziren lekura joan ziren, eta polizia iraintzeari ekin zioten. Ertzaintzatik azaldu zuten, «hiltzaile», «polizia madarikatu» eta «putakume» esanda iraindu zituzten ertzainak.

Halaber, lagun talde horrek «atxiloketa ekiditeko asmo argia» zeukala zehaztu zuten Ertzaintzakoek. Hala, ertzainetako bat heldu zutela azaldu zuten, eta «tirabiraka» ere aritu zirela. «Hori ikusita, ertzainek borra atera zituzten euren buruak babesteko», eta egoera baretuko zuten polizia gehiagoren zain geratu ziren. Gero, pertsoneta-

DATUA

Bost orduko ebakuntza

J.A.V.A. Gurutzetako ospitalean dago, koma egoeran. Hasieran, bakarrik zauri bat zeukala pentsatu zuten haren lagunek, baina arazoa us-te zuten baino larriagoa da. Odolbatua zeukan buruan, eta hori arintzeko, bost orduko ebakuntza egin behar izan zioten ospitalean. Ondoren, sendagileek koma egoeran ipini zuten nahita. Halaber, arnasa hartzeko makinen laguntza behar du.

ZAURITUAREN LAGUNAK

«Gizon hura hil egin behar zutela esan genien, eta orduan, ostikadak eta borrakadak ematen hasi zitzaizkigun»

HERRIZAINGO SAILA

«Atxiloketa saihesteko asmo argiarekin joan ziren; ertzainek borra atera behar izan zituzten euren buruak babesteko»

SEGI ERAKUNDEAK GERTAERA SALATU DU

Mobilizazioak Ezkerraldean

Atzo Baionan emandako prentsurrekoan, Segiko eldunek Barakaldoko gertaera «Euskal Herriak jasaten duen Estatua-ren bortizkeriaren» baitan kokatu zuten. «Kolare guziko txakurrez josia dago Euskal Herria, eta Ertzaintzak ere hiltzaile papera betetzen du» gazte erakundearen arabera. Desmilitarizazioak deia egin zuten, eta EAJ alderdia Ertzaintzaren jo-kaeraren arduradun zuzentzat jo. «Ikara giroa nagusitu nahi dute, edozein manifestazio edo poteo egitea arriskutsu bilakaraziz. Holako gertaerek, zoritxarrez, ez gaituzte harritzen, Ertzaintzak inpunitate osoz zanpatzen duelako jendea, zigor izpirik ukanen ez duela jakinez. Gainera, ezinezkoa zaigu bortxatzaileak identifikatzea, kaputxak babesturik jarduten dutelako». Bizkaiko Ezkerraldeko ikastetxeetan mobilizazioak eta geldialdiak burutzera deitu du Segik biharko.

ko batek buruan zauri bat zeukala ohartuta, anbulantzia bati deitu zioten, Gurutzetako ospitalera eraman zezan.

J.A.V.A.-ren familiakoak eta lagunak azaldu zuten, ez datoz bat Ertzaintzak izandako jarrerarekin, eta Barakaldoko Epaitegian salaketa ipiniko dute. Gertatutakoaren berri izandakoan, familiakoak eta lagunak Sestaoko Ertzain etxera joan ziren salaketa ipintzeko asmoarekin, baina bertan esan zieten kasu berezia zenez, ego-kiagoa zela Barakaldoko epaite- gira joatea.

Ertzaintzak ikerketa zabaldu du, gertatutakoa argitzeko

Herrizaingo Sailak igande goizaldean gertatutakoaren bertsioa jakinarazi zuen atzo. Hala ere, «horrelakoetan egiten ohi duen bezala», barne ikerketa zabaldu du gauzak argitu asmoz. Era berean, ikerketako emaitza Barakaldoko epaite- giaren esku utziko duela azpi- marratu zuen. Josu Jon Imaz Eusko Jaurilaritzako boze- ramaileak, bere aldetik, Ertzain- tzaren lana babestu zuen, «bere jardunean beti zaindu izan dituelako giza eskubideak». Horren adibide gisa jarri zuen ez dagoela Ertzaintzaren kon- trako epairik.